

Qilalukkanik qaqortanik qernertanillu illersuineq piniarnerlu pillugit Namminersornerullutik Oqartussat nalunaarutaat

Piniarnek aallaaniarnerlu pillugit Inatsisartut inatsisaanni nr. 12, 29. oktober 1999-imeersumi, kingullermik Inatsisartut inatsisaatigut nr. 9, 15. april 2003-meersumi allanngortinneqartumi § 2, §§ 6-8, §§ 11-21 aamma pinngortitamik illersuineq pillugu Inatsisartut inatsisaanni nr. 29, 18. december 2003-meersumi § 5 aamma § 60 malillugit aalajangersarneqarput:

Atuuffii

§ 1. Nalunaarummi Kalaallit Nunaanni qilalukkanik qaqortanik (*Delphinapterus leucas*) qilalukkanillu qernertanik (*Monodon monoceros*) illersuineq piniarnerlu pineqarput.

Imm. 2. Avannaarsuani Tunumilu Nunamut Allannngutsaaliukkamut kiisalu Qimusseriarsuarmi Uumasunik eqqissisimatitsivimmuut appakaassinnaanermut aalajangersakkat immikkut ittut atuupput, taamatuttaaq taakkunani inuit piniarsinnaatitaasut piniarnerannut aalajangersakkat. Sumiiffinnut taakkununnga marlunnut aalajangersakkat immikkut nalunaarutini aalajangersarneqarput.

Eqqissisimatitsineq

§ 2. Qilalukkat qaqortat qernertallu Kalaallit Nunaanni tamarmi eqqissisimatitaapput, § 3-mi taaneqartut kisiisa pinnagit.

Imm. 2. Piaqqat (uiat) arnavissallu piaqqisartut Kalaallit Nunaanni tamarmi eqqissisimatitaapput, tak. § 20 imm. 4.

Imm. 3. Taamaattoq imm. 1 aamma 2 sassanut atuutinngillat, tak. § 12.

Pisassiissutinik piniarfinnillu aalajangersaaneq

§ 3. Naalakkersuisut qilalukkanik qaqortanik qernertanillu ukiumut pisassiissutinik aalajangiisapput. Pisassiissutit aalajangerneqassapput nunat tamalaat isumaqatigiissutaat, uumassusilinnik misissuisut siunnersuinerat, atuisut ilisimasaat kiisalu Piniarnek Pillugu Siunnersuisoqatigiinnik tusarniaasimaneq eqqaamaniarlugit.

Imm. 2. Avanersuup Kommuniani qilalukkat qaqortat qernertallu piniagaaneranni tamatumunnga kommunimi ileqqoreqqusat atuupput. Ukiuni 2004-2008-mut pisaasussat ukiuni 1997-2001-imut pisaasimasunit amerlanerussanngillat. Naalakkersuisup ukiumut ataatsimut ukiunulluunniit arlalinnut pisassat amerlassusissaat taakkua tunngavigalugit aalajangertassavai. Pisanik nalunaarutaasimasut tunngavigalugit kingusinnerpaamik nalunaarutip atuutilerneraniit ukiut tallimaat qaangiuppata pisaasimasut tamakkerlugit nalilersuiffeqqinneqassapput.

Imm. 3. Kalaallit Nunaata Kitaata sinneranut immikkut pisassiissutininik aalajangersaasoqassaaq. Tassunga tunngatillugu Kalaallit Nunaata Kitaatut paasineqassaaq sinerik Upervaviup kommunita avannamut killeqarfaniit Kap Farvelimut.

Imm. 4. Kalaallit Nunaata Tunuanut pisassiissutininik aalajangersaasoqassanngilaq. Inuit inuussutissarsiutigalugu piniarsinnaanermut imaluunniit sunngiffimmi aallaaniarsinnaanermut atuuttumik allagartallit Tunumi qilalukkanik qaqortanik qernertanillu pisassiissutitigut killilersuinertaqaanngitsumik piniarsinnaapput, taamaattoq takuuk § 1, imm. 2.

Imm. 5. Ukiumoortumik piniarnermut pisassiissutit tamatumunngalu piumasaqaatit aalajangersarneqartut tusagassiorfitsigut nuna tamakkerlugu siammartartutigit tamanut saqqummiunneqassapput.

Imm. 6. Ukioq pisassiiffik tassa 1. julimiit 30. junimut, ullut taaneqartut ilanngullugit.

Piniarnermut pisassiissutininik agguassineq

§ 4. Piniarneq pillugu Siunnersuisoqatigiit Kitaani pisassiissuteqarluni piniarnissamut killiliussat pillugit tusarniaavigineqassapput. Kitaanut piniarnermut pisassiissutit kommuninut pisassiissutininut agguataarneqarnerat, Kalaallit Nunaanni Aalisartut Piniartullu Kattuffiata (KNAPK), Tapertaralugu Piniartartut Aalisartartullu Kattuffiata (TPAK) aamma Kalaallit Nunaanni Kommuneqarfiit Kattuffiata (KANUKOKA) tusarniaavigineqareernerisigut Aalisarnermut Piniarnermullu Naalakkersuisumit aalajangerneqassaaq.

Imm. 2. Aalisarnermut Piniarnermullu Naalakkersuisup kommuninut pisassiissutininut atatillugu pisariaqartumik allaffissornikkut aqutsineq kommuninut isumagisassanngortissinnaavaa.

Akuersissutininik tunniussineq agguassinerlu

§ 5. Kommunalbestyrelsi nunaqarfimmi aqutsisut najukkamilu aalisartut piniartullu peqatigiiffiat aamma najukkami sunngiffimmi piniartartut peqatigiiffiat isumasioqatigereerlugit kommunimi qilalukkanik qaqortanik qernertanillu pisassiissutit inuussutissarsiutigalugu piniartunut, immaqalu sunngiffimmi piniartartunut, agguanneqarnissaannut piumasaqaatinik aalajangersaasinnaavoq.

Imm. 2. Kommunimut pisassiissut pisaqarnissamut akuersissutitut normulersukkatut tunniunneqartassapput. Akuersissut ataaseq ukiumi pisassiiffusumi qilalukkamik ataatsimik pisaqarsinnaatitsivoq.

Imm. 3. Kommunalbestyrelsi pisassiissutigineqartunik peqqissaartumik nakkutilliisitsissaaq. Pisassiissutigineqartunik atuineq malittareqqissaarneqassaaq piniarnerlu ingerlaannartumik unitsinneqassalluni kommunimi pisassiissutigineqartut tamakkerneqarniariapata.

Imm. 4. Kommunalbestyrelsip pisassiissutigineqartoq tamakkerlugu pisaquineqarpat Aalisarnermut Piniarnermullu Pisortaqaarfik allakkatigit saaffigissavaa.

§ 6. Kommunalbestyrelsi pisaqarnissamut akuersissutit aaneqarnissaannut piffissamik killiliisinnaavoq.

Imm. 2. Piniartut pisaqarnissamut akuersissummik pissarsisimasut taanna atorsinnaanngikkunikku atoruanngikkunikkuunniit, akuersissut atorneqaanngitsoq piaarnerpaamik utertissavaat.

Imm. 3. Pisaqarnissamut akuersissutit aaneqaanngitsut utaqqisunullu allattorsimaffeqarpat taanna malillugu kommunimi agguateqqinneqarsinnaapput.

Piniarnissamut piumasaqaatit

§ 7. Aalisarnermut Piniarnermullu Naalakkersuisup qilalukkanik qaqortanik qernertanillu piniarnermut atatillugu piumasaqaateqarsinnaavoq, taamatuttaaq arferup ilaanik uumassusilinnik misissuisunut misissugassanngorlugu tunniussinissaq pillugu piumasaqaateqarsinnaalluni.

§ 8. Qoorortuumik atuinermi sulloqqortussuseq akuerisaq minnerpaamik 30-06-iuvoq (7,62x63 mm).

Taamaallaat patruunit aqerlui tamakkerlutik poorsimasut (hel mantel) atorneqarsinnaapput.

Imm. 2. Ajornartinnagu qilalugaq qaqortaq qernertarlunniit nangillugu toqussutissaanik aallaaneqartinnagu naalillugu annaanaveerneqassaaq.

Imm. 3. Aallaasit eqqarasuartaatit eqittaannartakkallu, qaartartut, qamutillit tuukkartallit, timmiarsiutit qoorortuuaqqallu atornissaat inerteqqutaavoq.

§ 9. Timmisartut, qulimiguulliit qamutillu motoorimik ingerlatillit suugaluartullunniit qilalukkanik qaqortanik qernertanillu piniarnermut atatillugu imaluunniit piniarfimmut tassanngaanniillu angallatigalugit atoqqussaangillat, taamaattoq § 12, imm. 4 takuuk.

§ 10. Taamaallaat angallatit 20 BRT/15 BT-tut (angallatip angissusianut uppersaasat malillugu) angissusillit taakkunanngaluunniit mikinerusut qilalukkanik qaqortanik qernertanillunniit piniarnermut atatillugu atorneqarsinnaapput.

Imm. 2. Qilalukkanik qaqortanik qernertanillunniit piniarnermut atatillugu umiarsuarnik attaveqarfigisanik atuinissaq inerteqqutaavoq.

Imm. 3. Nalunaarummi matumani umiarsuurtut attaveqarfigisatut paasineqassapput angallatit 20 BRT/15 BT-init anginerusut, kalittaatitut, qilalukkanik qaqortanik qernertanillu piniarnermut aallaavittut, qilalukkanik qaqortanik qernertanillu pisanik pilattarfittut imaluunniit angallatinit 20 BRT/15 BT-inik taakkuninngaluunniit mikinerusunit pisanik assartuutitut atorneqartut.

Ungusineq

§ 11. Ungusinikkut piniarnerit tamarmik soorlu sinerissamut patugullugit aninaveersitsineq imaluunniit sinerissamut imaluunniit sikup sinaanut tatisillugit assiinerit inerteqqutaapput.

Sassat

§ 12. Sassanik naammattuusoqarpat tamanna sapinngisamik piaarnerpaamik kommunalbestyrelsimit oqartussaasunut radiukkut oqarasuaatikkuunniit nalunaarutigineqassaaq. Kommunalbestyrelsip tusarnermi kinguningua tamanna Aalisarnermut Piniarnermullu Pisortaqarfimmut aamma illoqarfinnut nunaqarfinnut tamatuma eqqaaniittunut nalunaarutigissavaat.

Imm. 2. Kikkullunniit inuussutissarsiutigalugu piniarsinnaanermut imaluunniit sunngiffimmi aallaaniarsinnaanermut atuuttumik allagartallit sassinermi peqataasinnaapput. Sassinermi pisat piniartunut ataasiakkaanut kommunimullunniit pisassiissutitut ilaatinneqanngillat.

Imm. 3. Sassinermi pisat ima amerlatigisinnaapput kingusinnerpaamik sassinerup naammassinerata kingornatigut pisat tamakkerlutik qularnaatsumik qimussimik angerlaanneqarsinnaassallutik.

Imm. 4. Taamaattoorli pisuni immikkut ittuni silap sikullu pissusii pissutigalugit pisat tuaviortumik immikkullu ittumik angerlaassorneqartariaqalersillugit sassivimmiit qamuteralaat angerlaassuineri atorneqarnissaannut kommunalbestyrelsi immikkut akuersissuteqarsinnaavoq.

§ 13. Neqit, mattaat orsorlu nalunaaqutsikkat qilalukkallu pitutat piginnittui akuersitinnagit niki-sinneqassanngillat kommunalbestyrelsi sila pissutigalugu pisat angerlaannissaannut tunngatillugu piffissamik aalajangiisimangippat piffissaliussarlu taanna eqqortinneqarsimangippat.

Pilanneq

§ 14. Qilalugaq nunamut sikumulluunniit qaqiinnavillugu pilanneq aallartinneqassaaq. Nerisassartai atorneqarsinnaasullu allat tamarmik angerlaanneqarlutilluunniit qimatulineqassapput. Pilaffusimasoq perlukuarneqarsimassaaq.

Imm. 2. Angallatit 20 BRT/ 15 BT sinnerlugu angissusillit qilalukkanik pilaffigineqassanngillat.

Imm. 3. Angallatilli 20 BRT/15 BT taannaluunniit inorlugu angissusillit angallatip nammineq pisaanik pilaffigineqarsinnaapput.

Pisanik atuineq, tunitsivinnut tunisineq tuniniaanerlu il.il.

§ 15. Qilalukkat qaqortat qernertallu pisat tunineqassanngillat kommunalbestyrelsi akuersisummik naqissusiinikkut ullulerlugu pisamik nalunaarsuereertinnagu.

Imm. 2. Pisanik taakkualuunniit ilaannik tunisisoqassanngilaq pisisoqaraniluunniit akuersisummik piginnittoq (piginnittut) akuersissutip assilineranik naqissusiisitseqqartinnagit.

Imm. 3. Taamaattoq kommunip allaffia nunaqarfimmiluunniit allaffiup ammanerisa avataatigut tuniniaaneq aallartinneqarsinnaavoq allaffik ammarniariartoq nalunaarsuisoqarsinnaappat.

§ 16. Angallatit qilalukkat qaqortat qernertallu neqaannik, orsuinik mattaannillu tunitsivinnut tuniniaanermut atorneqassanngillat.

Imm. 2. Tunitsivinnut akuerisaasunut inuussutissarsiutigalugu piniartut piniarnermut allagartamik atuuttumik akuersisummillu naqissusersimasumik takutitsisinnaasut taamaallaat pisanik tunisisinnaapput.

Imm. 3. Naalakkersuisut kommuninut pisassiissutip iluani tunitsivinnut tunisassap angissusissaanik aalajangersaasinnaapput.

Imm. 4. Tunisassatut pisassiissutininik aalajangersaasoqarsimappat tunitsiviit tunisineq ingerlagallartillugu ullut tamaasa tunisat annertussusii pillugit Aalisarnermut Piniarnermullu Pisorta qarfimmut paasissutissanik nassiussisassapput.

Imm. 5. Naalakkersuisup kommunimi tunitsivimmut tunisinerup qaqugu uninnissaa nalunaarutigissavaa.

§ 17. Najukkami kalaalimineerniarfinni allatullu tuniniaaneq inuussutissarsiutigalugu piniartunit atuuttumik piniarnermut allagartalinnit pisaqarnissamullu akuersisummik naqissusikkamik peqartunit taamaallaat ingerlanneqarsinnaavoq.

Imm. 2. Toqqaannartumik suliffinnut, atorfeqarfinnut neriniartarfinnulluunniit tunisineq inuussutissarsiutigalugu piniartunit atuuttumik inuussutissarsiutigalugu piniarnermut allagartalinnit pisaqarnissamullu akuersisummik naqissusikkamik peqartunit taamaallaat ingerlanneqarsinnaavoq.

Imm. 3. Suliffinnut, atorfeqarfinnut neriniartarfinnulluunniit imm. 2-mi taanneqartut qilalukkap qaqortap qernertalluunniit neqaa, orsua mattaaluunniit inuussutissarsiutigalugu piniartumit atuuttumik piniarnermut allagartalimmit pisaqarnissamullu akuersisummik naqissusikkamik peqartunit pisiaasimanera uppersarsinnaassavaat.

Imm. 4. Uppernarsaat, imm. 3-mi pineqartoq tassaavoq pisinerup uppersarsaat atsiorsimasoq inuussutissarsiutigalugu piniarnermut allagartap pisaqarnissamullu akuersissutip naqissusersimasup assilineranik ilalik.

Piniartut atuisullu ilisimasaasa ilaatinneqarnerat

§ 18. Nalunaarutip peqqussutaasa allaffissornikkut ingerlanneqarneranni piniartut atuisullu ilisimasaat sapinngisamik ilaatinneqassapput.

Kommunimi ileqqoreqqusaaq

§ 19. Kommunalbestyrelsi kommunalbestyrsiilluunniit arlaliullutik peqatigiillutik kommunimi ileqqoreqqusakkut §§ 5 aamma 6, § 13 aamma § 19-imi imm. 2 aamma 3 naapertorlugit naleqqussaanernik annertunerusunik aalajangersaasinnaapput. Ileqqoreqqusaaq Aalisarnermut Piniarnermullu Naalakkersuisumit atuuttussanngortinneqassaaq.

Imm. 2. Kommunini qilalukkanik qaqortanik qernertanillu piniarnermut qassutinik atuiffiusuni kommunalbestyrelsi qassusersorneq pillugu kommunimi ileqqoreqqusaliussaaq.

Imm. 3. Kommunalbestyrelsi kommunimi ileqqoreqqusakkut pisassiissutit ataatsimoorluni piniarneqarnissaat pillugu malittarisassanik aalajangersaasinnaavoq. Ataatsimoorluni piniarnikkuttaaq qulakkeerneqassaaq pisassiissutit sipporneqannginnissaat, takuuk § 5, imm. 3-mi oqaaseqatigiit siulliit.

Nalunaaruteqarneq nakkutilliinerlu

§ 20. Qilalukkanik qaqortanik qernertanillu pisat, saniatigut pisat (pisarisuukkat) pissatallu sapinngisamik piaarnerpaamik kommunimut angerlarsimaffimmut nalunaarutigineqassapput. Nalunaaruteqarneq piniartumit pisaqartumit namminermit isumagineqassaaq, sassinermili pisat, inuussutissarsiutigalugu piniartut eqqarsaatigalugit najukkami Aalisartut Piniartullu Peqatigiiffiannit sunngiffimmi aallaaniartartut eqqarsaatigalugit kommunalbestyrelsimit nalunaarutigineqassallutik.

Imm. 2. Nalunaaruteqarnermi immersugassaaq nalunaarummut ilanngussap assinga atorineqassaaq. Immersugassat kommunip allaffiani nunaqarfimmiluunniit kommunip allaffiani pineqarsinnaapput. Qilalukkanut pisanut pissatanullu ataasiakkaanut tamanut immersuiffissaaq ataaseq immersorneqassaaq, taamaattoorli sassinermi pisat tamarmik immersuiffissami ataatsimi nalunaarutigineqassallutik.

Imm. 3. Qaammatit naanerini pisanik nalunaarutit immersuukkat kommunalbestyrelsip Aalisarner-mut Piniarnernermullu Pisortaqarfimmut nassutissavai.

Imm. 4. Taamatuttaaq qilalukkanik qaqortanik qernertanillu pisat tamaasa Piniarneq-mi pisanik nalunaarnermi nalunaarutigineqassapput. Unioqqutitsilluni pisaqartoqarsimatillugu taakkua ukiumi tullermi pisassiinermi kommunip qilalukkanik qaqortanik qernertanillu pisassaanit ilanngaatigineqartassapput. Piaraq unioqqutitsilluni pisaq qilalukkatut qaqortatut qernertatulluunniit inersimasutut nalilerneqartassaaq.

§ 21. Inuussutissarsiutigalugu piniarsinnaanermut imaluunniit sunngiffimmi aallaaniarsinnaanermut allagartaq pisaqarsinnaanermullu akuersissut imaluunniit pisiortorsinnaanermut akuersissut atuuttoq politiit, piniarnermik nakkutilliisut tamatumunngalu piginnaatitaasut piumasaqarnerisigut tamatigut takutinneqartassaaq.

Immikkut akuersissuteqarneq

§ 22. Aalisarnermut Piniarnermullu Naalakkersuisooq ilisimatusarnermut imaluunniit nunap piniagassatigut pisuussutaasa nalunaarsorneqarnerannut atatillugu nalunaarummi malittarisassat atortinneqannginnissaannik immikkut akuersissuteqarsinnaavoq.

Pineqaatissiinerit

§ 23. § 2-mik, § 3, imm. 4, § 5, imm. 2, §§ 8-17 aamma § 20-mik kiisalu § 7 naapertorlugu piumasaqaatinik unioqqutitsisoq, imaluunniit pisisoq tunisisorluunniit, pisiortornerulluunniit unitsinneqarneranik nalunaaruteqarnerup kingornatigut pisiortortoq akiliisussanngortillugu pisanilluunniit arsaarneqartussanngorlugu pineqaatissinneqarsinnaavoq.

Imm. 2. Nalunaarut malillugu kommunimi ileqqoreqqusanik atortussanngortinneqarsimasunik unioqqutitsisoqartillugu akiliisitsinermik pisanillu arsaarinninnermik pineqaatissiisoqarsinnaavoq.

Atuutilerpera

§ 24. Nalunaarut 1. marts 2004 atuutilerpoq. Peqatigitillugu Qilalukkanik qaqortanik qernertanillu piniarneq pillugu Namminersornerullutik Oqartussat nalunaarutaat nr. 30, 11. oktober 1995-imeersoq kingusinnerusukkullu allannguut atorunnaarput. Taamaakkaluartoq kommunip ileqqoreqqusai nalunaarut malillugu atulersinneqartut allanngortinneqarnissamik atorunnaarsinneqarnissamilluunniit tungaannut atuutiinnarallassapput.

Imm. 2. Sassat pillugit Landsrådip ileqqoreqqusaa 18. januar 1958-imeersoq naapertorlugu kommunini ileqqoreqqusaliat atortussanngortinneqarsimasut imaluunniit allakkiat atuutiinnassapput piniarnermut piumasaqaatinik sukumiinerusunik imaqarunik.

Namminersornerullutik Oqartussat, ulloq 12. februar 2004.

Simon Olsen

/

Amalie Jessen

Ilanngussaq (pdf-format)

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut